

MINYONE MI JÉRÉMIE

- 1 Ngo'o aka'a ntaban nlam w'atabe étam, wu ô nga to bôt été ne lut !
O nto ane nkus, wu ô nga to anen menyoñe me bôt été!
Wu ô mbe ngon njô bôt mfa'a ya bitune mesi ô nto wu w'aya'ane bôte befe taxe !
- 2 W'ayôn mbia miñyôn alu, a mili'i me nto wô memañ;
Bibone bié bise, teke jia j'avolô wô nlem :
Bemvôé bé bese be boya wô njoñ; be nto besiñe bé.
- 3 Juda a keya nkôm amu ajô njuk, nalé fe amu ajô beta éto ôlo;
A to meyoñe me bôt été, teke yen awo'an :
Bekpwe'ele bé bese be nga koane nye vôm a mbe ôbametan.
- 4 Mezene me Sion m'ayôn, amu bôt be nji fe bata zu beta ésulane;
Mimbé mi aka'a mié mise mi nto éngôngo, beprêtre bé b'asôé abuk :
Bindune bengone bié bi ayen njuk, émien a to fe mbia be mam été.
- 5 Bôt be ne nye ngame yat be maneya tebe ôsu, mame ya besiñe bé m'ake ôsu;
Amu Jehova a ndeñeleya nye amu ajô ya jama minkobane wé :
Bone bé be ngenane bongo be keya minkôm asu môte ya ngame yat.
- 6 Etôto'o jé ése é kôlôya be ngone ya Sion :
Bivete bié bi nto ane minko'o mi ne te yene bidi;
A bi maneya ke te fe ngule nyô asu ya nyô a titan.
- 7 Jérusalem a simesane mam mé mese me ne mvaé me nga to ataté
melu ya mvus, melu a yen njuk a mame ya éngôngo :
Eyoñ bôte bé be nga ku mo me môte ya yat été, a te ke môt a nga volô nye,
Bôte ya ngame yat ve kpwe'ele bingôngole bi mame bié.
- 8 Jérusalem a boya abé abui; ajô te a nto ane jôm é ne mvin;
Ba bese be nga semé nye b' abiasé nye, amu be yeneya soé jé :
Ya, a sôé abuk, a kôñelan mvus.
- 9 Mvine jé é nga to nye mfa' étun éwomane jé ya si; a nji simesane asu'ulane dé;
Ajô te a keya si étua nkean ; a nji bi mvolô nlem.
A Jehova, fombô'ô nju'u wom ; amu nsif a neneya émien.
- 10 Môt ya ngame yat a maneya same wo a buti mam mé mese me ne mvaé :
Amu a yeneya na, meyoñ me maneya nyine vôme wé a ne étyi,
Ajô dap nde ô nga ve atiñe na, b'aye bo te nyin ésulane bôte jôé été.
- 11 Bôte bé bese b' asôé abuk, b'ajeñe fembé ;
Be maneya ve biôm biap bi ne mvaé mfa'a bidi ya wômôlô nlem :
A Jehova, yenek, a fombô ; amu me nto mbia nsilane si.

Rev. Matthias
Général

- 12 Ye jam ete e ne mia momo, mia bese mi alôtan ?
Fomba'an, a yen nge ôlun éziñ vi afunan ane ôlune viam, ñvie ô vebaneya be ma,
Nvie ôte Jehova a maneya ndeñele me vie môse ya beta ayaa wé.
- 13 A lomeya nduan bivese biam été é so'o yôp, nje é dañeya bie ngu ;
A maneya ya mebo mam avot, a maneya me kôñelan mvus :
A boya me éngôngo a ate'e nyô ngume môs.
- 14 Ebôñeté ya minkobane miam é ne nka'an a wo wé;
Mi nto minsobetan, mi beteya tyiñe jame yôp; a boya ngule jam atek :
Tate a vey a me mo map été, me se ngule ya tebe be ngame yat.
- 15 Tate a maneya biasé biwôlô bi bôte biam bi to zañe jam bise;
A maneya tôkane beta ésulan ngame jame yat mfa'a ya fite bendômane bam :
Tate a maneya tibi éndun ngone ya Juda aval ane b'atibi ébé b'amiate bibuma.
- 16 M'ayi amu mam mete; dise dam, dise dam d'alene mendim;
Amu mvolô a yiane wômôlô nleme wom a ne me ôyap :
Bone bam be nto éngôngo, amu nsiñ a maneya dañ.
- 17 Sion a same mo; môte ya volô nye nlem a ne momo ;
Jehova a vey a atiñ ajô Jacob na, ba b'abômane nye b'ayiane tebe nye ngame yat :
Jérusalem a ne be zañ aval ane jôm é ne mvin.
- 18 Jehova a ne zôsô ; amu me nga kôlô si a ben atiñe dé :
Vô'ôla'an , m'aye'elane mia, mia meyoñe mese, a fombô ôlune viam :
Bindune bengone biam a bendômane bam be maneya ke minkôm.
- 19 Me nga loene bibone biam, ve bi nga viane du'u ma :
Beprière bam a bemvendé bam be nga wu nlam été,
Eyoñ be nga jeñe bidi ya wômôlô minlem miap.
- 20 Tame fombô, A Jehova; amu me nto nju' été; nlem w'awô'ô njuk ;
Nlem ô maneya me kôñelan abum été; amu me nga ben mbia mbenan:
Mimfa'a mife nkpwaté mekôn w'awôé, mfa'a ya jale ke a nto ane awu.
- 21 Be maneya wô'ô na, m'asôé abuk; môte ya volô me nlem a ne momo;
Besiñe bam bese be maneya wô'ôtan nju'u wom; b'avak ane ô boya jam ete :
W'aye soo môs ô nga kak, a b'aye bo aval ane ma.
- 22 Abé dap ese e za' asu dôé;
O bo'o be, ane ô nga bo fe ma amu minkobane miam mise :
Amu minsôane mebu'u miam mi ne abui, a nleme wom ô ne atek.

2 Aka'a mbutan Tate a butiya ngone Sion a nkut éyoñ a yaa!

A wuaya abeñe ya Israël si aso yôp akui si,

Rev. Matthias
Secrétaire Général

- A nji simesan éto jé a beté mebo môse ya ayaa dé.
- 2 Tate a mineya bitaba'a bi Jacob bise, te ke ko éngôngo :
A wuaya aleme ya ngone Juda si ayaa dé été ;
A siliya de si ; a ndamaneya étyi ya ayoñ ete a bivete ya été.
- 3 A tyi'iya ngum nla' Israël ôse ne bem a beta ñyaane wé :
A dutuya mbo nnômé wé mvus asu besiñ:
A di'iya Jacob ane nduan j'ayôñ, nje j'ake j'adi'i mimfa'a mise.
- 4 A viteya élaé jé ane nsiñ, a tebeya a mbo nnôme wé aval ane môte ya ngame yat,
A wôéya ba bese mis me nga yen mvaé ;
A sôéya ayaa dé aval ane nduan nda éndelé ya ngone Sion été.
- 5 Tate a boya ane nsiñ, a mineya Israël;
A mineya menda bejô bôte mé mese, a tyameya aleme dé;
A neneya fe du a miñyône ya ngone Juda.
- 6 Nde fe a wôléya tabernacle wé a évô, aval ane nge a ne jôme ya afup ; a tyameya vôme wé wô'ô
Sulan:
Jehova a tindiya na be vuane beta ésulán a sabbat Sion été,
A biaséya fe njô bôt ba prêtre ayôñe ya ayaa dé été.
- 7 Tate a wuaya autel wé fé, a yeneya vôme wé a ne étyi ane angônda jôm ;
A veyá mimfine ya menda bejô bôte mé mo besiñ :
Be boya zô'é nda Jehova été, aval ane môse ya beta ésulán.
- 8 Jehova a tyi'iya nlem été na, a tyam aka'a ya ngone Sion ;
A limeya nko, a nji dutu wo wé mvus mfa'a ya jiane mam :
A veyá mon aka'a ya aka'a yôp ba nya aka'a du ; bi ate'e bibaane.
- 9 Mimbé mi aka'a mié mi maneya nyine si été ; a tyameya mimfeta'a mié a bu'u mie :
Njô bôte wé ba be bivete bié be nto meyoñ été vôm metiñ me ne momo;
Ya, bekulu mejô bé be ne te yen ñyenán ô so'o be Jehova.
- 10 Bemvendé ya ngone Sion b'atabe tyia, b'atabe bivô;
Be maneya kut mbuluk minlô miap; be maneya jaé minkuta mengeteñ :
Bindune bengone ya Jérusalem bi ajomé minlô miap akui si.
- 11 Mise mam m'adim a milik, nleme wom w'awô'ô njuk;
Ese'e jam j' asôébane si, amun njañan ngone ya bôte bam,
Amu bitum bi bon a minyañabé bi aku som minseñe ya nlam été.
- 12 Bi ajô benyia bape na, Fôn ba vin bi ne vé ?
Eyoñ bi aku som aval ane ba b'abalé meveñ minseñe ya nlam été,
Eyoñ minlem miap mi asôébane tôé benyia bap été.
- 13 M'aye kate wo jé ? m'aye funane wo a za jômô, A ngone ya Jérusalem ?

Rev. Matthias
Secrétaire Général

M'aye ve'e wo aval ane za jômô, ane me ne volô wo nlem, A éndun ngone ya Sion ?
Amu ntyaman be nga tyame wo ô ne anen ane mañ : za a ne ngule ya saé wo ?

14 Bekulu mejô bôé be yeneya mam ajô dôé me ne medu'an a akut;

A be nji kulan abé dôé, ane be ne bulane wo mfa' ô nga ke nkôm,

Ve be yeneya ajô dôé minkulan mi ne medu'an a bifia ya kape wo si fe.

15 Ba bese b'alôt b'akute wo mekôp; B'avim ngone ya Jérusalem a fô'ô je minlô miap, a jô na,

Ye nlam bôt be nga loene na, Nné abeñ, Meva'a ya si se, ye ñwô wu ?

16 Besiñe bôé bese be maneya kui wo menyu map ne vôñ !

B' avim a latane mesôñ; b'ajô na, Bi maneya nye;

Môs bi nga jeñ, ñwô fo'o wu ; bi koéya, bi yeneya wô.

17 Jehova a boya jam a nga ty'i na a ye bo : a tôéya mejô a nga tiñeti melu me ya mvus;

A wuaya si, te ke ko éngôngo :

Nde fe a veyá nsiñe wôé ngule ya va'a be wo; a beteya nla'a ya bôt be ne wo ngame yate yôp.

18 Minlem miap mi nga yône be Tate:

A aka'a ya ngone Sion, mili'i me lene'e si aval ane ôsôé môs ba alu ;

Te ve womien awo'an ; nyia dise wôé a bo'o te jô'é.

19 Kôlô'ô si, yône' alu se, éyoñ bôt b'ataté mombô ;

Sôé' nleme wôé si ane mendim asu Tate :

Same' e mo môé yôp be nye amu ajô ényiñe ya bitum bi bone biôé, mbie bi aku some zaé

nsakôé ôse

20 Fombô'ô, A Jehova, a yene nyô ô nga bo aval ete !

Ye binga b'aye viane di bibuma biap, bon b'ase' ese mo?

Ye prêtre ba nkulu mejô b'aye wôéban nda Tate é ne étyi été ?

21 Ndôman ba nnôm be jô'ô si minseñ été;

Bindune bengone biam a bendômane bam be kuya a nkpwaté mekôn :

O wôéya be môse ya ayaa dôé; ô maneya wôé, te ke ko éngôngo.

22 O maneya loene beangôndô be mame bam mimfa'a mise, aval ane môse ya beta ésulan ;

A te ke môt a nga nyiñ nge li'i môs Jehova a nga yaa :

Ba me nga se' ese mo a yale, mbe nsiñe wom a maneya jian.

Rev. Matthias
Secrétaire Général

3 Ma me ne môt a yeneya njuk amu ntume ya ayaa dé.

2 A litiya me zen a wulu me dibi été, sa éfufup.

3 A kôñelane fo'o me wo wé ngame yat biyoñe biyoñ nté môs.
4 A boya minsône miam a ékôpe na, bi yômbô; a bu'uya bivese biam.
5 A maneya lôñe me ngame yat, a bômane me a zôñ a nju' ésaé.
6 A tindiya ma me tabe mevôm me ne dibi, aval ane ba be wuya ayap.
7 A bômaneya me akak, me bo te ngule ya kui atan; a boya ngôkope jam adit.
8 Ya, éyoñ m'ayôn, a loen mvolan, a dipe meye'elane mam.
9 A dibeya mezene mam a aka' e ne nlôñane mimbaane mekok, a boya mezene mam bikotekot.
10 A nto mfa'a wom aval ane ours a yabe, avale fe ane ñbweñbwem mevôm me ne asoé.
11 A maneya vite mezene mame feñ, a té me bifus ; a boya me éngôngo.
12 A viteya élaé jé, a telé ma me bo éve'a ya akoñ élaé.
13 A boya na, mekoñ m'aso nkope wé m'anyine me abum.
14 Me nto jôm bôte bam bese b'abiasé, a b'ayia me jia nté môs.
15 A jaléya me ayô, a jaléya me a ôvuta ne lut !
16 A bu'uya fe mesôñe mam a mekôk; a viseya me a asup.
17 O vaaya nleme wom vôm mvo'é é né ôyap; me nga vuane mame ya afok.
18 Nde me nga jô na, Ngule jam é jañeya, a mam me nga to me ndi be Jehova.
19 Simesa'an ékpwe'ele jam a nju'u wom, ôvuta ba zôñ.
20 Nleme wom ô ngenan ô simesa'ane bie, a w'ajombô abume dam été.
21 Jame di nde m' asimesan; ajô te me to ndi nlem.
22 Vôm bi ne te jañ, jam ete d'aso amu mvame Jehova, amu a ne te kate ko engôngo.
23 Mam mete me ne mimfefé tyé ése ; ntôane mame wôé ô ne anen.
24 Jehova a ne ngape jam, nalé nleme wom w' ajô ; ajô te m'aye tabe ndi be nye.
25 Jehova a bo ba b'ayange nye mvaé, mfa'a ya nlem w'ajeñe nye.
26 A ne mvaé na, môt a tabe ndi nlem a yange nyiane Jehova a to évô.
27 A ne mvaé na, môt a be'e éboñeté melu a to ndôman.
28 A tame tabe si étam a tabe évô, amu a betéya nye je.
29 A futi' anyu dé mbulu' été, nge ndi nlem é ne bo été.
30 A ke' amañ be nyô a bibi nye : a tame jaé bijô ne lut !
31 Amu Tate a ye ke wua nye fé nnôm éto.
32 Amu na, ja'an a ve ôlun, ve a ye fe ko éngôngo aval ane abui mame ya mvame jé e né.
33 Amu a nji kpwe'ele amu nkômban, nge ve bone be bôt ôlun.
34 Mfa'a ya fite mimbô'ô mise ya si nyô abo si,
35 Mfa'a ya vône zôsô ya môt asu ya Nyô A Dañe Yôp,
36 Mfa'a ya kôñelane môt ajô dé, Tate a ne te kañese.
37 Za a ne nyô a jô, a jam ete d'aboban, éyoñ Tate a ne te tiñeti de ?
38 Ye abé ba mvaé bi ne te so anyu Nyô A Dañe Yôp ?

Rev. Matthias
Secrétaire Général

- 39 Amu jé fe vevea mỗt a beta bemen, mỗt ate a sôane melepe ya mam abé mé ?
- 40 Bi tame jeñ a ve'ele mezene mangan, a beta kôñelane be Jehova.
- 41 Bi tame bete nleme wongane yôp a fulane mo mangan be Zambe yôp été.
- 42 Bi maneya tyam metiñ a bene fe njôan ; ô nji ke jamé.
- 43 O maneya vise bia ayaa a ke w'atitane fe bia ; ô maneya wôé, ô nji ko éngôngo.
- 44 O maneya buti womien a nkut, nde te ke meye'elan me ne ngule ya tulan.
- 45 O boya bia ane mvin b'asé a mbuan zañe meyoñ.
- 46 Besiñe bangane bese be maneya bia kui menyu map ne vôñ ngame jangane yat.
- 47 Woñ ba ébé bi kuiya be bia, éndaman a njian.
- 48 Dise dam d'alén a atôñe mendim, amu njian ngone ya bôte bam.
- 49 Dise dam d'alene si, te ke jô'é, te ke awo'an,
- 50 Akekui Jehova a fombô si, a yen a to yôp été.
- 51 Dise dam d'anambe me nlem, amu bengone bese ya nlame wom.
- 52 Be jaéya titane me aval ane ônon, ba be ne besiñe bam te éfia.
- 53 Be tyi'iya ényiñe jam étun nda mimbô' été, a mane me wua ako'o yôp.
- 54 Mendim me nga lôte me nlô yôp ; me nga jô na, Me nto ntyi'an.
- 55 Me nga lone jôé dôé, A Jehova, me to susu'a nda mimbô' été.
- 56 Ane ô nga wô'ô tyiñe jam ; te solé alo dôé éyoñ m'avebe, éyoñ m'ayôn.
- 57 O nga subu bébé môs me nga loene wo ; ô nga jô na, Te ko woñ.
- 58 A Tat, ô volôya kobô mejô me ya nleme wom ; ô kôtéya ényiñe jam.
- 59 A Jehova, ô yeneya abé be nga bo ma, wo, tyi' ajô dam.
- 60 O yeneya akuna'a dap ese a mefe'e map mese be nga bo ma.
- 61 O wô'ôya mbo'olane be nga bo'olô ma, A Jehova, a mefe'e map mese be nga bo ma.
- 62 Biyaé ya ba be nga kôlô si ngame jame yat, a mefe'e be nga bo me ngume môs.
- 63 Fombô'ô ntaban b'atabe si, a nkôlan b'akôlô fe si ; me nto jia jap.
- 64 W'aye ve be meya'an, A Jehova, aval ane ésaé ya mo map é né.
- 65 W'aye ve be ayet nlem, biyo'é biôé mfa'a wop.
- 66 W'aye tôñe be ayaa dôé été, a jiane be yôpe ya Jehova si.

4 Ngo'o ane or a biliya kôndé ! ngo'o ane nya or a ne mfuban a maneya kôñelan !

Meko'o ya nda é ne étyi me maneya sôébane si nsakôé ôse.

- 2 Bone be Sion be ne bidima, be funa'ane nya or,
Ngo'o be lô be aval ane bimvañe metek, ésaé ya mo me mmé meviek !
- 3 Ja'ana bezôé b'akuli abé, b'anyia ayôme bone dap :
Ngone ya bôte bam é nto njet, aval ane beéngutu fé été.
- 4 Oyeme ya nyañabé vi akabetan nda anyu amu évé :

Rev. Matthias
Général

- Bitum bi bon bi aja'é fembé, te ke mô't a be'e be je.
- 5 Ba be nga bo be ja'a ngô'sé be nto bingôgole minseñe minseñ :
Ba be nga yaé be jaé' bivele mengômesan b'awubane mekun.
- 6 Amu mbia be mame ya ngone ya bôte bam me ne anen a dañ abé ya Sodome,
Nyô a nga wuabane si ôyôm étun nté, mo te nambe nye.
- 7 Biwôlô bi bôte bié bi mbe mimfuban a dañe neige, bi mbe bifumulu a dañe menyañ ;
Menyôle map me nga vé a dañe meko'o me ne édima, ngembane wop ô mbe a ne wu
ya saphir.
- 8 Mesu map me nto bivindi a dañe da'a ; be nji yeme be minseñ :
Ekôpe jap j'akabetane be bives ; é nto nkôt, é nto aval ane ôlé.
- 9 Ba b'awôéban a nkpwaté mekôn be ne mvaé a dañe ba b'awôéban a zaé ;
Amu bana b'ake b'abok, be nto ñwuane menyô, amu njembane bibuma ya afup.
- 10 Mo ya bingôngole bi binga me maneya yame bone bap bebien ;
Mbe be mbe bidi biap éyoñe ya njian ngone ya bôte bam.
- 11 Jehova a tôéya ayaa dé, a kuli ya mbia ñyaane wé ;
A kôbaneya nduan, Sion été, nje é di'iya mimbôka'a ya été.
- 12 Bejô bôte ya si nyô be nga bo te buni, nalé fe bôte bese be to si nyô be nji buni,
Na, môte ya ngame yat ba nsiñ b'aye nyine mimbé mi aka'a ya Jérusalem.
- 13 Jam ete d'abo amu mam abé ya bekulu mejô bé, a mbia be mame ya beprêtre bé,
Mbe be kuluya metyi ya bezôsô zañe jé.
- 14 B'ake b'andéñ ane mindindim minseñ été, be mbe'e nsem amu metyi.
Nde bôt be se ngule ya nambe mengômesane map.
- 15 Mi kôla'an, nalé be nga jô be, Mvin ! kôla'an, kôla'an, te namban !
Eyoñ be nga tup a ke b'andéñ, bôt be nga jô meyoñ été na, B'aye fe beta tabe va.
- 16 Ayaa Jehova nde e tyamelaneya be ; a ye bo te fe beta fombô be :
Be nji semé menyôle beprêtre, be nji kam bemvendé.
- 17 Mise mangan me ngenan ma ketek mfomban bi afombô momo mvolane wongan :
Mmomban bi nga mombô bi nga mombô ayoñ e nji bo ngule ya nyii mô't.
- 18 B'ayabe meda mebo mangan, jam ete bi se ngule ya wulu minseñe miangan été :
Asu'ulane dangan e nto bebé, melu mangan me kpwaneya ; amu asu'ulane dangan e
kuiya.
- 19 Ba be nga tôñe bia be mbe avô a dañe bendôé ya yôp :
Be nga titane bia minkôle yôp, be nga yabe bia fé été.
- 20 Mvebe ya môé mangan, nyô a ne ñwo'an mbone ya Jehova, a nga nyoñebane bibé
biap été ;
Ajô dé bi nga jô na, Bi aye tabe nsisiñe wé si meyoñ été.
- 21 Va'ak, a wô'ô mvaé, A ngon Édôm, nyô é to si ya Uts :

Elaé j'aye fe tulan a kui be wo ; w'aye sok, a telé womiene soé.

22 Melepe ya mbia be mam môé me bobaneya, A ngone Sion ; a ye fe beta ke wo minkôm ;

A ye jom mbia be mam môé, A ngon Édôm ; a ye kulan mam abé môé.

5 A Jehova, simesa'ane jam e kuiya be bia :

Fombô'ô, a yen ane b'abo'olô bia.

2 Ngape ya si jangan é maneya kôñelane mo bejin,
Menda mangane ke mo bôte ya mesi mefe.

3 Bi nto bobenyui a te ke beésa ;
Benyia bangan be nto ane minkus.

4 Bi maneya nyu mendime mangan amu moné ;
B'akuane bia nja'a jangan.

5 Bôt b'atôñe bia b'abebe bia metyiñe yôp :
Bi ju'uya, te bi awo'an.

6 Bi veyá mo mfa'a ya Beégyptien,
A mfa'a ya Beassyrien, a kômbô jaé bidi.

7 Betate bangan be nga bo abé, be se fe ;
A bia bi maneya be'e mbia be mam map.

8 Bebo bisaé, mbe b'ajôô bia :
Nyô a ye nyii bia mo map a ne momo.

9 Bi ayene bidi biangan a njuane ya ényiiñe jangan,
Amu nkpwaté mekôné ya fé.

10 Ekôpe jangan é nto évindi ane mbuñ b'ayam bidi,
Amu beta ayôñe ya mfumbale ya zaé.

11 Be nga jô'ôbô binga Sion éte a ngu,
A bindune bengon minlame ya Juda éte.

12 Bivet bi nga tyelébane yôp a wo wop :
Be nji semé mesu bemvendé.

13 Bendôman be nga be'e ako'o ya ko'o bidi,
A bongô be nga kolé ôbak be beke'e nja'a.

14 Bemvendé be nji fe bo mfa'a ya mbé akak,
Bendôman be jô'éya ñyiane bia ;

15 Ava'a ya minlem miangan e maneya ;
Abô'ô dangan e veñesaneya du.

16 Couronne e kuya mfa'a ya nlô wongan :



Rev. Matthias
Secrétaire Général

- Ngo'o bia ! amu bi boya abé.
- 17 Amu jame di minlem miangan mi nto atek ;
A mise mangan m'adim amu mam mete ;
- 18 Amu nkôle Sion, ñwô ô nto élik :
Bemva'a b'awulu wô été.
- 19 Wo, A Jehova, ô to nnôm éto ;
Eto njôô jôé j'aso miaé bôte wua akui miaé bôt mbok.
- 20 Amu jé w'avuane bia nnôm éto,
A jô'é bia aka'a ayap ?
- 21 Kôñela'ane bia be wo, A Jehova, a bi aye bo nkôñelan ;
Beta'a bo melu mangane mimféfé aval ane melu mvus.
- 22 Ve ô beneya bia nya mbenane ;
W'adañe yaa bia.



Rev. Matthias
Secrétaire Général